

LA USC DI LADINS – VENERDI' 17 NOVEMBRE 2017

L Comun general capogrop de n nef projet turistic

Na neva rei turistica europeèna é stata portèda dant a Bruxelles da la vize presidenta de l'NPLD Sabrina Rasom e da la procuradora Elena Testor

Mendranzes - L'à abù bon ejit, ai 10 de november a Bruxelles, al convegn de l'NPLD (la rei europeèna che se cruzia del stravardament e de la valorisazion de la desvalivanzes linguistiches), l projet "Raions con mendranzes linguistiches desche valor enjontà: na proponeta de colaborazion", portà dant da Sabrina Rasom, responsabola di Servijes linguistics e culturèi del Comun General de Fascia e ence vize presidenta de l'NPLD, e da la procuradora del Comun general de Fascia Elena Testor. Dò la radunanza de la rei europeèna metuda a jir via per de jugn passà a Soraga, de chela che l'é stat moscià l video endèna la scontrèda belga (prest se l podarà veder ence tel sit web de l'NPLD), che l'à abù desche argoment prinzipal i lengac e la cultures de mendranza desche ressorsa per l turism, te Fascia se à seghità a lurèr en cont de chest argoment. "L'idea del nef projet – à spiegà Sabrina Rasom – l'é meter en esser na rei turistica europeèna anter mendranzes linguistiches che engaisse la jent a jir a cognoscer i raions e donca a aer na cognoscenza maora di lesc de origin. La proponeta la é stata tutta sù ai 10 de november dal comitat de gestion de l'NPLD e da la presidenta Sietske Poepjes e l'à



La procuradora del Comun general de Fascia Elena Testor e la responsabola di servijes linguistics Sabrina Rasom al convegn de l'NPLD a Bruxelles.

ence soscedà subito l'enteress di basches, galeisc e zimbres. Per ades se trata de n sboz sun chel che volon lurèr per l meter a jir jà tel 2018".

L projet perveit desvaliva azions: meter a jir la cognoscenza de la mendranzes linguistiches de l'Europa, fèr aprijèr sia

carateristiches, dèr didament a l'economia de la region engaissan na vida desvaliva de turism, meter en esser neves posc de lurier forman



esperc de comunanzes linguistiches de mendranza. "Pisson che lengaz, cultura e identità ladina – à dit la procuradora Elena Testor, che col Comun general la sostegn la ativitèdes de l'NPLD – sie na vera ressorsa ence per l turism: sie na rejon culturèla per tor consaputa de nosc teritorie. Coscita la val, che fin ades aon valorisà dal pont de veduda ambientèl, ence tras l recognosciment Unesco, e de l'azet, con investimenc fac per strutures e servijes, podessa smaorèr sia perferida ence con la particolarità del lengaz e de la cultura ladina". N barat, donca, no demò turistic, ma ence de cognoszenzes e de bona prateghes metudes a jir da popolazions de mendranza de chel che Fascia l'é l capogrop. "Percheche se mete en दौरa la scomenzadiva – à spiegà Testor – se cogn aer l didament de l'Apt, de la sociazions turisticas e culturales, soraldut de l'Istitut Cultural Ladin de Fascia e ence de la Scola de Fascia, che assane gust de tirèr ite. Ne saessa bel esser vertesc jà per l'an che vegn». De segur se cogn aer fons per endrezèr n projet de nivel european. «En colaborazion con l'NPLD cognaron troèr finanziamenc europeans, ma ence ressorses locales". (es_cgf)